

禮儀典第三百五卷

養老部彙考一

有虞氏

帝舜養老于庠用燕禮

按王制凡養老有虞氏以燕禮

陳注

養老之禮其目有四養三老五更一

也子孫死于國事則養其父祖二也養致仕之老三也養庶人之老四也一歲之間凡七行之飲養陽氣則用春夏食養陰氣則用秋冬四時各一也凡大合樂必遂養老謂春入學合菜合舞秋頒學合聲則通前爲六又季春大合樂天子視學亦養老凡七也燕禮者一獻之禮既畢皆坐而飲酒以至于醉其牲用狗其禮亦有二一是燕同姓二是燕異姓也

養國老于上庠養庶老于下庠

陳注

行養老之禮必于學以其爲講明孝弟禮義之所也國老有爵

有德之老庶老庶人及死事者之父祖也國老尊故于大學庶老卑故于小學上庠大學在西郊下庠小學在國中王宮之東

深衣而養老

陳注

深衣白布衣也

按杜佑通典有虞氏深衣而養老養國老于上庠養庶老于下

庠而用燕禮憲養氣體而不乞言有差則記之爲惇史 憲法也養之爲法其德行惇史史孝厚者也

夏

夏制養老于序用饗禮

按王制凡養老夏后氏以饗禮

陳

注饗禮者體薦而不食爵盈而不飲立

而不坐依尊卑爲獻數畢而止然亦有四焉諸侯來朝一也王親戚及諸侯之臣來聘二也戎狄之君使來三也饗宿衛及耆老孤子四也惟宿衛及耆老孤子則以酒醉爲度

養國老于東序養庶老于西序

陳

注東序大學在國中王宮之東西序小學在西郊

燕衣而養老

陳

注燕衣黑衣也夏后氏尚黑君與羣臣燕飲之服卽諸侯日視朝之服也其冠則元

冠而緇帶素鞞白舄也

殷

殷制養老于學用食禮

按王制凡養老殷人以食禮

陳

注食禮者有飯有殺雖設酒而不飲其禮

以飯爲主故曰食也然亦有二焉大行人云食禮九舉及公食大夫之類謂之禮食其臣下自與

賓客旦夕共食則謂之燕食也饗食禮之正故行之于廟燕以示慈惠故行之于寢也

養國老于右學養庶老于左學

陳

右學大學在西郊左學小學在國中王宮之東

縞衣而養老

陳

縞生絹亦名素此縞衣則謂白布深衣也

周

周制養老兼用虞夏殷之禮

按王制凡養老有虞氏以燕禮夏后氏以饗禮殷人以食禮周人修

而兼用之

陳

春夏則用虞之燕夏之饗秋冬則用殷之食周尚文故兼用三代之禮也

五十養於鄉六十養於國七十養於學達於諸侯

陳

鄉鄉學也國國中小學也學大學也達於諸

侯者天子養老之禮諸侯通得行之無降殺也

八十拜君命一坐再至薨亦如之九十使人受

陳

人君有命人臣拜受禮也惟八十之老與無目

之人爲難備禮故其拜也足一跪而首再至地以備再拜之數九十則又不必親拜特使人代受

此言君致享食之禮於其家而受之之禮如此然他命則亦必然矣

五十異糧六十宿肉七十貳膳八十常珍九十飲食不離寢膳飲從于遊可也

陳

異糧糧也異者精

粗與少者殊也宿肉謂恆隔日備之不使求而不得也膳食之善者每有副貳不使闕乏也常珍常食皆珍味也不離寢言寢處之所恆有庋閣之飲食也美善之膳水漿之飲隨其常遊之處而爲之備具可也

六十歲制七十時制八十月制九十日修唯絞衾冒死而后制

陳注此言漸老則漸近死期當豫

爲送終之備也歲制謂棺也不易可成故歲制衣物之難得者須三月可辦故云時制衣物之易得者則一月可就故云月制至九十則棺衣皆具無事于制作但每日修理之恐或有不完整也絞所以收束衣服爲堅急者也衿單被也絞與衿皆用十五升布爲之凡衾皆五幅士小斂緇衾殯裏大斂則二衾冒所以韜尸制如直囊上曰質下曰殺其用之先以殺韜足而上次以質韜首而下齊于手士緇冒殯殺象生時元衣纁裳也此四物須死乃制以其易成故也

五十始衰六十非肉不飽七十非帛不暖八十非人不煖九十雖得人不煖矣五十杖于家六十杖于鄉七十杖于國八十杖于朝九十者天子欲有問焉則就其室以珍從

陳注巡守而就見百年者

泛言衆庶之老此就見九十者專指有爵者也祭義又言八十君問則就之者亦異禮也

七十不俟朝八十月告存九十日有秩

陳

不俟朝者謂朝君之時入至朝位君出揖卽退不待朝

事畢也此謂當致仕之年而不得謝者告猶問也君每月使人致膳告問存否也秩常也日使人以常膳致之也

五十不從力政六十不與服戎七十不與賓客之事八十齊衰之事弗及也五十而爵六十不親學

七十致政唯衰麻爲喪

陳

五十而爵命爲大夫也不親學以其不能備弟子之禮也致政事以其

不能勝職任之勞也或有死喪之事唯備衰麻之服而已其他禮節皆在所不責也

養國老于東膠養庶老于虞庠虞庠在國之西郊

陳

東膠大學在國中王宮之東虞庠小學在西

郊

元衣而養老

陳

元衣亦朝服也緇衣素裳十五升布爲之六入爲元七入爲緇故緇衣亦名元衣

也又按夏氏尙黑衣裳皆黑殷尙白則衣裳皆白周兼用之故元衣而素裳凡諸侯朝服卽天子燕服而諸侯之行燕禮亦此服也

按周禮天官外饗邦饗耆老孤子則掌其割烹之事 賈氏曰耆老者死事者之父祖兼有國老庶

古今圖書集成
老 程伊川曰外饗酒正皆言饗耆老孤子則酒食未嘗偏廢也周官言饗不言食亦以饗未嘗無食也特以食爲下爾言老足矣必曰耆老者容養之以六十而上爲率歟以六十養于國故也酒正凡饗耆老孤子皆共其酒無酌數 鄭鍔曰饗禮之嚴凡設而不倚爵盈而不飲所以訓恭儉而此言共酒無酌數何也蓋此所謂饗非大饗也耆老之子孤子之父死于王事憫其惻獨無依或用酒以飲之所以念其功其饗之也不過以醉爲度示恩意之厚耳

地官大司徒之職以保息六養萬民二曰養老 鄭康成曰七十養于鄉五十異糧之屬 鄭鍔曰八十九十曰耄百年曰期頤月有所給或行復除乃所以養之

豪人若饗耆老共其食

夏官羅氏中春羅春鳥獻鳩以養國老 陳及之曰天子之于老也其所養者三國老也庶老也死政之老也國老與庶老異其學所以別分義記之所言四代養老是也而又有死政之老焉故羅氏獻鳩以養之者國老也司徒以保息之者庶老也司門以財養之者死政之老也若夫外饗酒正豪人所謂耆老者總三者而言之也

秋官伊耆氏下士一人徒二人 鄭鍔曰先王篤養老之禮爲其氣體已衰年德彌尊設爲賜杖之制以優之自七十杖于國至八十杖于朝取伊耆息老之義以名官且取耆艾之義 陸氏曰禮記曰伊耆氏始爲蜡爲伊耆氏掌共王之齒杖以耆待杖然後安猶老物待蜡然後息也伊耆氏有功于耆老者也故後世以其官爲姓周以其姓名官先儒爲其制鼓籥又始爲蜡于是以爲古王者號然隸首造數容成造曆蒼頡造書之類豈爲古王者哉 黃氏曰刑官終于伊耆氏杖所以扶老者安之也

共王之齒杖 鄭鍔曰國老年齒已高在禮宜杖是之謂齒杖以齒論之雖可以杖必出于王之所賜然後杖伊耆氏之職則共之于王而王用以賜也周家之杖有五十六七十八十在鄉在家在國在朝之異此所共者其在朝在國者乎漢之哀帝賜孔光以靈壽杖其有周舊典歟 王昭禹曰共王之齒杖老老也

漢

高祖二年置三老以十月賜酒肉 按漢書高祖本紀二年二月舉民年五十以上有修行能帥衆

爲善置以爲三老鄉一人擇鄉三老一人爲縣三老與縣令丞尉以事相教後勿繇戍以十月賜酒肉

文帝元年詔存問長老賜酒肉帛絮有差 按漢書文帝本紀元年三月詔曰老者非帛不煖非肉不飽今歲首不時使人存問長老又無布帛酒肉之賜將何以佐天下子孫孝養其親今聞吏稟當受鬻者或以陳粟豈稱養老之意哉具爲令有司請令縣道年八十以上賜米人月一石肉二十斤酒五斗其九十以上又賜帛人一疋絮三斤賜物及當稟鬻米者長吏闔視丞若尉致不滿九十嗇夫令史致二千石遣都吏循行不稱者督之刑者及有罪耐以上不用此令

武帝建元元年二月賜年八十復二算九十復甲卒四月詔九十以上復子若孫遂其供養 按漢書武帝本紀建元元年春二月賜民爵一級年八十復二算九十復甲卒夏四月己巳詔曰古之立教鄉閭以齒朝廷以爵扶世導民莫善於德然則於鄉里先耆艾奉高年古之道也今天下孝子順孫願自竭盡以承其親外迫公事內乏資財是以孝心闕焉朕甚哀之民年九十以上已有受鬻法爲復子若孫令得身帥妻妾遂其供養之事

元狩元年詔賜三老鰥寡孤獨米帛有差 按漢書武帝本紀元狩元年夏四月詔曰朕嘉孝弟力田哀夫老眊孤獨鰥寡或置于衣食甚憐愍焉其遣謁者巡行天下存問致賜曰皇帝使謁者賜縣三老孝者帛人五匹鄉三老弟者力田帛人三匹年九十以上及鰥寡孤獨帛人二匹絮三斤八十以上米人三石

宣帝地節三年詔賜鰥寡孤獨高年帛 按漢書宣帝本紀地節三年春三月詔曰鰥寡孤獨高年貧困之民朕所憐也前下詔假公田貸種食其加賜鰥寡孤獨高年帛二千石嚴教吏謹視遇毋令失職

元康四年詔八十以上非誣告傷人者勿坐 按漢書宣帝本紀元康四年春正月詔曰朕惟耆老之人髮齒墮落血氣衰微亦亡暴虐之心今或罹文法拘執囹圄不終天命朕甚憐之自今以來諸年八十以上非誣告傷人他皆勿坐

元帝建昭四年詔遣使存問耆老鰥寡孤獨 按漢書元帝本紀建昭四年夏四月詔曰朕承先帝之休烈夙夜栗栗懼不克任問耆陰陽不調五行失序百姓饑饉惟烝庶之失業臨遣諫大夫博士

賞等二十一人循行天下存問耆老鰥寡孤獨乏困失職之人舉茂材特立之士相將九卿其帥意毋怠使朕獲觀教化之流焉

平帝元始元年春正月詔天下吏比二千石以上年老致仕者參分故祿以一與之終其身 按漢書平帝本紀云云

後漢

世祖建武六年詔郡國給粟高年 按後漢書世祖本紀建武六年春正月辛酉詔曰往歲水旱蝗蟲爲災穀價騰躍人用困乏朕惟百姓無以自贍惻然愍之其命郡國有穀者給粟高年鰥寡孤獨及篤癯無家屬貧不能自存者如律二千石勉加循撫無令失職

明帝永平二年初行養老禮 按後漢書明帝本紀永平二年冬十月壬子幸辟雍初行養老禮詔曰光武皇帝建三朝之禮而未及臨饗眇眇小子屬當聖業間暮春吉辰初行大射令月元日復踐辟雍尊事三老兄事五更安車輶輪供綏執授侯王設醬公卿饌珍朕親袒割執爵而醕祝哽在前祝咽在後升歌鹿鳴下管新宮八佾具修萬舞于庭朕固薄德何以克當易陳賁乘詩刺彼己永念

慙收無忘厥心三老李躬年耆學明五更桓榮授朕尙書詩曰無德不報無言不酬其賜榮爵關內侯食邑五千戶三老五更皆以二千石祿養終厥身其賜天下三老酒人一石肉四十斤有司其存耆耄恤幼孤惠鰥寡稱朕意焉 按禮儀志永平二年初帥羣臣躬養三老五更于辟雍先吉日司徒上太傅若講師故三公人名用其德行年耆高者一人爲老次一人爲更也皆服都紵大袍單衣皁緣領袖中衣冠進賢扶玉杖五更亦如之不杖皆齋于太學講堂其日乘輿先到辟雍禮殿御座東廂遣使者安車迎三老五更天子迎于門屏交禮道自阼階三老升自賓階至階天子揖如禮三老升東面三公設几九卿正履天子親袒割牲執醬而饋執爵而酌祝饌在前祝饌在後五更南面公進供禮亦如之明日皆詣闕謝恩以見禮遇大尊顯故也 孝經援神契曰尊三老者父象也謁者奉几安車輓輪供綬執事五更寵以度接禮交容謙恭順貌宋均曰三老老人知天地人事者奉几授三老也安車坐乘之車輓輪蒲裏輪供綬三老就車天子親執綬授之五更老人知五行更代之事者度法也度以寵異之也鄭元注禮記曰皆年老更事致仕者也名三五者取象三辰五星天所因以照明天下者元又一注皆老人更知三德五事者也應劭漢官儀曰三老五更

三代所尊也安車輶輪送迎至家天子獨拜于屏三者道成于天地人老者久也舊也五者訓于五品更者五世長子更更相代言其能以善道改更己也三老五更皆取有首妻男女完具臣昭按桓榮五更後除兄子二人補四百石則榮非長子矣蔡邕曰五更長老之稱也盧植禮記注曰選三公老者爲三老卿大夫中之老者爲五更亦參五之也月令章句曰三老國老也五更庶老也禮記曰天子適饌省醴養老之珍具遂發詠焉退修之以孝養反升歌清廟孝養之詩也譙周五經然否曰漢初或云三老答天子拜遭王莽之亂法度殘缺漢中興定禮儀羣臣欲令三老答拜城門校尉董鈞駁曰養三老所以教事父之道也若答拜是使天下答子拜也詔從鈞議譙周論之曰禮尸服上服猶以非親之故答子拜士見異國君亦答子拜是皆不得視猶子也虞喜曰且據漢儀于門屏交禮交禮卽答拜中興謬從鈞議後革之深得其意

永平七年冬十月丙子臨辟雍養三老五更 按後漢書明帝本紀云云

章帝建初七年秋九月己酉進幸鄴勞饗魏郡守令已下至于三老門闌走卒賜錢各有差 按後漢書章帝本紀云云

章和元年詔賜高年布帛以爲醴酪 按後漢書章帝本紀章和元年秋七月壬戌詔曰秋令是月養衰老授几杖行糜粥飲食其賜高年二人共布帛各二匹以爲醴酪

和帝永元十四年春三月戊辰臨辟雍饗射 按後漢書和帝本紀云云

永元十五年秋九月壬午南巡狩賜所過三老官屬及民百年者錢布各有差 按後漢書和帝本紀云云

安帝元初四年詔有司親行糜粥以養老 按後漢書安帝本紀元初四年秋七月辛丑詔曰今年秋稼茂好垂可收穫而連雨未霽懼必淹傷夕惕惟憂思念厥敗夫霖雨者人怨之所致其武吏以威暴下文吏妄行苛刻鄉吏因公生姦爲百姓所患苦者有司顯明其罰又月令仲秋養衰老授几杖行糜粥方今案比之時郡縣多不奉行雖有糜粥糠粃相半長吏怠事莫有躬親甚違詔書養老之意其務崇仁恕賑護寡獨稱朕意焉

順帝陽嘉三年詔賜民年八十九十者米肉帛絮有差 按後漢書順帝本紀陽嘉三年五月戊戌詔賜民年八十以上米人一斛肉二十斤酒五斗九十以上加賜帛人二匹絮三斤

桓帝建和二年賜八十以上米酒九十以上加綿帛 按後漢書桓帝本紀建和二年春正月皇帝加元服大赦天下年八十以上賜米酒肉九十以上加帛二匹綿三斤

永興二年冬十一月校獵上林苑遂至函谷關賜所過道傍年九十以上錢各有差 按後漢書桓帝本紀云云

魏

明帝太和六年三月癸酉行東巡所過存問高年 按三國魏志明帝本紀云云

高貴鄉公甘露三年詔行養老禮 按三國魏志高貴鄉公本紀甘露三年秋八月丙寅詔曰夫養

老興教三代所以樹風化垂不朽也必有三老五更以崇至敬乞言納誨著在惇史然後六合承流下觀而化宜妙簡德行以充其選關內侯王祥履仁秉義雅志淳固關內侯鄭小同溫恭孝友帥禮不忒其以祥爲三老小同爲五更車駕親率羣司躬行古禮焉 按晉書禮志甘露二年天子親

帥羣司行養老之禮于是王祥爲三老鄭小同爲五更其儀注不存然漢禮猶在 按杜佑通典

甘露二年天子親帥羣司行養老之禮于太學命王祥爲三老鄭小同爲五更王祥南面几杖以師

道自居天子北面乞言祥陳明王聖帝君臣政化之要以訓之聞者莫不砥勵

晉

惠帝永平元年五月壬午賜高年鰥寡力田者帛人三匹 按晉書惠帝本紀云云

成帝咸和元年春二月丁亥賜鰥寡孤老米人二斛 按晉書成帝本紀云云

宋

孝武帝大明七年詔賜高年粟帛羊酒 按宋書孝武帝本紀大明七年二月詔故邑耆舊在目罕存年世未遠已殲大半撫迹惟事傾慨兼著太宗燕故晉陽洽恩世祖流仁濟畿陽澤永言往猷思廣前資遣使巡慰厚賜粟帛高年加以羊酒冬十月車駕巡南豫州詔曰朕巡幸所經先見百年者及孤寡老疾並賜粟帛十二月行幸歷陽高年孤疾賜帛十四

南齊

武帝永明五年詔賜諸孤老糧餼 按南齊書武帝本紀永明五年春正月辛卯詔曰朕昧爽丕顯思康民瘼雖年穀亟登而饑饉代有今履端肇運陽和告始宜協時休覃茲黎庶諸孤老並賜糧餼

遣使親賦每存均普

永明七年詔諸大夫年秩隆重者增俸給役 按南齊書武帝本紀永明七年春正月戊辰詔曰諸

大夫年秩隆重祿力殊薄豈所謂下車惟舊趨橋敬老可增俸詳給見役

明帝建武元年詔百官耆齒者一遵永明七年前銓叙之科 按南齊書明帝本紀建武元年十

一月庚子詔曰日者有司耆齒許以自陳東西二省猶沾微俸辭事私庭榮祿兼謝興言愛老實有

矜懷可一遵永明七年前銓叙之科 按唐府元龜先是永明中御史中丞沈淵表百官年登

七十者皆令致仕故有是詔

北魏

太武帝太延元年十一月丙子行幸鄴諸所過對問高年 按北魏書太武帝本紀云云

太平眞君七年二月丙戌幸長安存問父老 按北魏書太武帝本紀云云

文成帝和平二年親見高年詔八十以上者一子不從役 按北魏書文成帝本紀和平二年三月

幸中山至于鄴遂幸信都輿駕所過皆親對高年問民疾苦詔民年八十以上一子不從役